

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 12/2

10 մարտի 2017թ.

Քննարկվեց «Արաս Ֆուդ» ՍՊԸ գանգատը ՀՀ ԿԱ ՊԵԿ ՕՀՎ 13.01.2017թ. թիվ 1110440 ակտի դեմ:

«Արաս Ֆուդ» ՍՊԸ գանգատում բերված փաստարկները.

ՀՀ ԿԱ ՊԵԿ Օպերատիվ հետախուզական վարչության կողմից ՀՀ ԿԱ ՊԵԿ նախագահի կողմից համաձայն թիվ 1110440 առ 27.12.2016թ. հանձնարարագրի «Արաս Ֆուդ» ՍՊԸ-ում իրականացվել է հսկիչ նշանների (դրոշմապիտակների) կիրառման ճշտության ստուգում: Ստուգման արդյունքում կազմվել է թիվ 1110440 առ 13.01.2017թ. ստուգման ակտը, համաձայն որի, «Արաս Ֆուդ» ՍՊԸ-ին առաջադրվել է 500.000 դրամի վճարման ենթակա տուգանք:

Նախ հարկ է ուշադրություն դարձնել այն հանգամանքին, որ «Արաս Ֆուդ» ՍՊԸ-ի մոտ համաձայն ՀՀ ԿԱ ՊԵԿ նախագահի թիվ 111040 ստուգման հանձնարարագրով ստուգում իրականացնող անձիք իրավասու չէին իրականացնել ստուգում և արձանագրել «Առևտրի և ծառայությունների մասին» ՀՀ օրենքի 9.4-րդ հոդվածի պահանջների համաձայն խախտում, քանի որ ընկերությունն ի սկզբանե չի զբաղվել և չի ունեցել հսկիչ նշաններով փակցվող ապրանքների ապրանքաշրջանառություն և Վարչական իրավախախտումների վերաբերյալ ՀՀ օրենսգրքի 170⁹ հոդվածի (Ակցիզային դրոշմանիշերով և (կամ) դրոշմապիտակներով դրոշմավորման կանոնները խախտելը) այս պարագայում կիրառելի չէ: Միաժամանակ հարկ է նշել, որ ընկերությունը պիտակները ձեռք է բերել և իրացրել մինչև Վարչական իրավախախտումների վերաբերյալ ՀՀ օրենսգրքի 170⁹ հոդվածի 16.05.16 ՀՕ-82-Ն փոփոխությունը:

Ելնելով վերոգրյալից՝ գանգատաբերը խնդրում է անվավեր ճանաչել թիվ 1110440 ստուգման ակտը:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև՝ Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության.

Քննարկման ընթացքում նշվեց, որ ՀՀ ԿԱ ՊԵԿ նախագահի 27.12.2016թ. թիվ 1110440 հանձնարարագրի համաձայն «Արաս Ֆուդ» ՍՊԸ-ում (այսուհետ նաև՝ ընկերություն) կատարվել է հսկիչ նշանների (դրոշմապիտակների) կիրառման ճշտության ստուգում: Արդյունքում կազմվել է ՀՀ ԿԱ ՊԵԿ ՕՀՎ 13.01.2017թ. թիվ 1110440 ակտը (այսուհետ նաև՝ Ակտ), որի 1-ին կետով մասնավորապես արձանագրվել է հետևյալը.

«Առևտրի և ծառայությունների մասին» ՀՀ օրենքի 9.2 հոդվածի համաձայն՝ «ՀՀ տարածքում արտադրված կամ ՀՀ տարածք ներմուծված՝ շշալցված, փաթեթավորված կամ ցանկացած այլ ձևով տարալորված՝ սույն հոդցածով ներկայացված

աղյուսակում ներառված ապրանքների վրա, օտարման ցանկացած փուլում դրոշմապիտակի առկայությունը պարտադիր է»:

Նույն օրենքի 9.4-րդ հոդվածի համաձայն՝ դրոշմավորված ապրանքների վրա պետք է փակցված լինի չվնասված, ամբողջական և դրոշմավորման ենթակա ապրանքի տարողությանը (ծավալային, քաշին կամ տվյալ ապրանքատեսակին բնորոշ չափման այլ միավորին) համապատասխանող դրոշմապիտակ:

Ստուգմամբ պարզվել է, որ ընկերությունը խախտելով վերը նշված հոդվածի պահանջները՝ դրոշմապիտակներով դրոշմավորման կանոնների խախտմամբ համապատասխան հարկային հաշիվներով «Էվրիկա գրուպ» ՍՊԸ-ին իրացրել է իր կողմից ներմուծված «Լիպտոն» տեսակի թեյ 25 տուփ 14.250 դրամ արժեքով (1 տուփի վաճառքի արժեքն է 570 դրամ):

Գանգատում բերված պնդումների վերաբերյալ, որ ստուգումն իրականացնող անձինք իրավասու չէին իրականացնել ստուգում և արձանագրել «Առևտրի և ծառայությունների մասին» ՀՀ օրենքի 9.4-րդ հոդվածի պահանջների խախտում, հարկ է նշել, որ դրանք հիմնավոր չեն, քանի որ «Հայաստանի Հանրապետությունում ստուգումների կազմակերպման և անցկացման մասին» ՀՀ օրենքի 3-րդ հոդվածի 2-րդ մասով հստակ սահմանված է, որ հարկային մարմինների կողմից ակցիզային դրոշմանիշերի, դրոշմապիտակների և հսկիչ-դրամարկային մեքենաների կիրառման, օրենքով սահմանված ելակետային տվյալների և գործակիցների, տարադրամի փոխանակման կետերի կամ արժութային դիլերների-բրոքերների ստուգումների, չձևակերպված աշխատողների բացահայտմանն ուղղված ստուգումների դեպքերում հարկային մարմնի ղեկավարի որոշմամբ հրամանի կամ հանձնարարագրի տրման լիազորությունը կարող է փոխանցվել հարկային (տարածքային) տեսչության պետին:

Տվյալ դեպքում իրականացված ստուգմամբ արձանագրվել է, որ ընկերությունը խախտելով «Առևտրի և ծառայությունների մասին» ՀՀ օրենքի 9.2 և 9.4 հոդվածների պահանջները «Էվրիկա Գրուպ» ՍՊԸ-ին իրացրել է իր կողմից ներմուծված «Լիպտոն» տեսակի թեյ՝ դրոշմապիտակներով դրոշմավորման կանոնների խախտմամբ: Մասնավորապես, ստուգմամբ պարզվել է, որ 25 տուփ «Լիպտոն» տեսակի թեյի դրոշմապիտակները չեն ներառում տվյալ ապրանքին բնորոշ ոչ մի տեսակի տեղեկատվություն (տեսակ, նկարագիր, քաշ, ծավալ, պահպանման ժամկետ): Առկա է միայն ներմուծողի անվանումը, հասցեն և ՀՎՀՀ-ն: Վերը նշված դրոշմապիտակները «Արաս Ֆուդ» ՍՊԸ-ն հարկային մարմիններից ստացել է 2015թ. մարտի 12-ին:

Միևնույն ժամանակ, ՀՀ ԿԱ ՊԵԿ տեղեկատվական տեխնոլոգիաների վարչության կողմից տրամադրած տեղեկատվության համաձայն, վերը նշված 25 տուփ «Լիպտոն» տեսակի թեյի միայն 4-ն են դրոշմավորված դրոշմավորման կանոնների խախտմամբ (բ94265096, բ93831247, բ93793972, բ93791239): Մնացած 21 տուփ «Լիպտոն» տեսակի թեյի տուփերը դրոշմավորված են առանց դրոշմավորման կանոնների խախտմամբ:

Վերոգրյալից հետևում է, որ Ակտով արձանագրված խախտումը ոչ թե 25 տուփ «Լիպտոն» տեսակի թեյի գծով է, այլ միայն 4 տուփի գծով:

Ինչ վերաբերվում է գանգատում բերված այն պնդումներին, որ ընկերությունը պիտակները ձեռք է բերել և իրացրել է մինչև Վարչական իրավախախտումների վերաբերյալ ՀՀ օրենսգրքի 170⁹ հոդվածում 16.05.2016թ. (ՀՕ-82-Ն) կատարված փոփոխությունը, ապա նշված պնդումները հիմնավոր չեն, քանի որ 4 տուփ թեյի՝ առանց

դրոշմապիտակների վերաբերյալ սահմանված կարգով էլեկտրոնային գրանցման կատարման դրոշմավորված ապրանքների իրացումը տեղի է ունեցել 16.05.2016թ. հետո ընկած ժամանակահատվածում:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի, «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

ո Ր Ո Շ Ո Ւ Մ Է՝

ՀՀ ԿԱ ՊԵԿ ՕՀՎ 13.01.2017թ. թիվ 1110440 ակտը թողնել անփոփոխ, իսկ գանգատը՝ մերժել:

Սույն որոշմանը չհամաձայնվելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել տեսչական մարմինների միասնական բողոքարկման հանձնաժողով կամ ՀՀ վարչական դատարան:

Հանձնաժողովի նախագահ՝



Վ.ՄԻՐՈՒՄՅԱՆ